



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3 Yangia anidakangma :

Tir Yimyim

tirymyim@aolima

tir yimyim

TAPAK 7

CM Sonowal-i syndicate raj
mazüokteter: Dilip Kumar Paul

Wheelchair nung mener election
atema nüboyimtsü: Mamata

VOL. XVIII NO. 147 (ADOK 147) DIMAPUR

ROGONÜ (FRIDAY)

METSÜREMI (MARCH) 12, 2021

₹ 5.00

Nagaland nung COVID-19 cases tasen mesüra taneptsü angur meliasü

Kohima, Metsüremi/March 11 (TYO): Nagaland nung ananü tashi COVID-19 cases tasen mesüra taneptsü angur meliasü aser data memelenshie 12,217 nung lir, ta health ketdangsür kati Brehostibarnü ashi.

"Tanü COVID-19 +ve cases & taneptsü angur keta meliasü," ta Minister, Health & Family Welfare, S Pangnyu Phom-i Twitter nung metetdaksü.

Caseload nungya taneptsü angur nisung 11,963 dena lir, ta pai ashi. Taneptsü anguba rate ya shilem 97.92 lir, ta Director, Health and Family Welfare, Dr Denis Hangsing-ia sangdong ka nung ashi.

Ajak senteper danga tashidak agi menepa alir nisung 10 densema nisung 91 iba tashidak agi süogo aser nisung 153 danga state temi ogo, ta pai ashi.

Nagaland nung tang COVID-19 active cases ya Kohima kisüing nung nisung ter lir, saka parnok ya asymptomatic lir, ta pai ashi. Tanüingba district 11 nung positive cases kata mali.

Nagaland nung tang tashinung

COVID-19 alitsü südi ta temolung meleme sample 1,33,252 tendangogo aser item rongnung RT-PCR ajanga 75,192, TrueNat ajanga 37,473 aser Rapid Antigen Test ajanga 20,587 tendanga liasü, ta paisa ashi.

Bodhbarnü Nagaland nung nisung 42,490 nem COVID-19 mozü doses 49,695 agütsüogo aser item rongnung teintet rogo 2,912 aser arishi küm 45 tema danga tashidak agi meneper alir nisung 465 densema lir, ta State Immunization Officer, Dr. Ritu Thurr-i ashi.

State nung tang tashinung COVID-19 mozü agir alirtem rongnung frontline worker 28,194 aser healthcare professionals 10,919 alitsü, ta Dr. Thurr-isa ashi.

Healthcare worker 6,359 aser frontline worker 1,311 nem COVID-19 mozü dose tanabuba agüja iba mozü course tembangogo, ta pai ashi.

State nung tanü tashinung iba mozü agir alirtem rongnung nisung kata mozüki nung anepalutsüsa timtem ajuruba mali, ta Dr. Thurr-i ashi.

Assam Election 2021: 1st Phase atema candidate 284 lir

Guwahati, Metsüremi/March 11 (Agencies): Assam Assembly indang menden 47 atema March 27 nü phase mezüingbuba election agitsü asoshi nomination paper tem asadanga tendangba nung tetokteper nisung 248 temsüa aliba ngutet, ta Chief Electoral Officer (CEO) ajanga Brehostibarnü ashi.

Mezüing phase atema nisung 295-i nomination paper agitsü aser Bodhbarnü scrutiny agiba mapang paper 284 temsüa aliba ngutet, ta CEO office ajanga ashi.

BJP nungi nüburtemi meteta aliba candidate Chief Minister Sarbananda Sonowal (Majuli), Speaker Hitendra Nath Goswami (Jorhat), ministers Ranjit Dutta (Behali) Naba Kumar Doley (Dhakuakhana-ST) aser Sanjoy Kishan (Tinsukia) nungertem indang nomination paper tem temsüa aliba ngutet.

NDA alliance nung AGP nungi ministers Atul Bora (Bokakhat) aser Keshab Mahanta (Kaliabor) nungertema temsüa liasü.

Assam Pradesh Congress Committee tir Ripun Bora (Gohpur), Congress Legislature Party lenir Debabrata Saikia (Nazira), AICC secretary Bhupen

Borah (Bihpuria) aser taoba mapang minister inyaka alir Bharat Narah (Naoboicha), Pranatee Phukan (Naharkatiya) aser Rakibul Hussain (Samaguri) nungertem indang paper nung tai aputsü meliasü.

Assam Jatiya Parishad (AJP) tir Lurinjoyti Gogoi (Duliajan and Naharkatiya), tepuokdak yua aliba anti-CAA activist aser Rajior Dal tekolakba Akhil Gogoi (Mariani aser Sivasagar) nungertem paper shidak liasü, ta election ketdangsürtemi ashi.

Akhil Gogoi ya independent candidate ka ama tokteper, kechiaser par telok ya political party ka ama agizüka mali.

Mezüing phase atema nomination agütsütsü anogoji March 9 ya tatem liasü, Bodhbarnü scrutiny agi aser withdrawal atema March 12 ya tatema lir.

Assam Assembly nung züngsem 126 atema election ya phase asem kuma lemsar agitsü, kong April 1 nü tanabuba phase nung constituency 39 nung election agitsü, aser tasembuba phase nung meden 40 atema April 6 nü agitsü.

Centre Superintendent tem senden ayonger

Dimapur, Metsürem/March 11 (TYO): Nagaland Board of School Education-i sangdong ka ajanga, HSLC aser HSSLC, 2021 tatidang Centre Superintendent tem March 17 nü 11:00 ako nungi tenzüka online senden ka akatsü ayongzüka metetdaksüogo.

Iba senden nung Centre Superintendent tem shilem aser khuret, temzüing ozüing aser

tatidang dak sendakba nung ken o tem benoka sensak asemtsü.

Iba senden nung Centre Superintendents ajak tamakok maludaksüi jangrabangra shilem agitsü metetdaksüogo. Senden ID aser Passcode mapang tatsüka lir Centre Superintendents WhatsApp groups nung lemsateptsü, ta kasa sangdong ajanga metetdaksü.

"Edible Insects for Sustainable Livelihood" Workshop tenzüko



March 11 nü "Edible Insects for Sustainable Livelihood" workshop tenzüka mapang ketdangsertem aser sentong nung shilem agirtem tangokba noksa nung angur.

Kohima, Metsüremi/March 11 (TYO): Tarutsü atema süngko longben amala shiruru tilateritem ya chiyongsü tongtimbang asütsü. North East India nung entomophagy ya akidang amenokadokogo aser parnok sobaliba nung yangloka lir. Iba dak ajemdaker Ashoka Trust for Research in Ecology and the Environment (ATREE) aser Department of Zoology, Kohima Science College Jotsoma na longjemer tanü nungi "Edible Insects for Sustainable Livelihood" workshop ka Kohima Science College Jotsoma nung tenzüko.

Anogo ana workshop agiba mapang shiruru tilateri metsüba aser benenda inyakyim mesamadaksüi wazüka ayutsü koda tongtimbang iba indang sensak asemtsü.

Iba workshop nung shilem agirtemi tachila shiruru tilateri koda jangjatsü aser metsütsü iba indang angazüksü.

Kasa mapang nung shiruru tilateri jangjatsü, metsütsü, value added products aser entrepreneurship dak sendakba nung tangazükba agütsütsü.

Iba workshop ya Department of Biotechnology (DBT)-i senotsü teyari agüja bushitsüingdangba project "Bio resources and Sustainable Livelihoods in Northeast India" nung shilem ka

ama ayongzüko, koba Additional Director of Agriculture, Nagaland C. Peter Yanthan-i tenzüka liasü.

Sentong nung o jembiba mapang pai, Nagaland nung shiruru tilateritem jangjatsü koda tongtimbang iba indang lemsatepba den tachila shiruru tilateritem dak sendakba nung pa tajangshibatam aser aluyimba nung item shiruru koda tongtimbang iba indang lemsatep.

Iba workshop nung shilem agitsü atema Northeast India ajunga nungi nisung 30 züngoksema lir.

Nüngtugu university balala nungi shisalen agütsürtemi parnok shisatsü lemsateptsü atema jaokogo. Iba den session kar atemabo iba onük jangjaa aliba lisopur kar jaoka lir.

Senior Fellow, ATREE Bangalore Dr. Priyadarsanan Dharma Rajan-i, Northeast nung iba workshop ayongzüka agiba koda tongtimbang iba indang lemsatep.

Sentong nung HoD, Department of Zoology, Kohima Science College Jotsoma Dzesevituo Angami-i lokti pelaa agizükba o jembiba aser principal Kohima Science College Jotsoma Dr. Lily Sema-i tir o jembiba liasü.

Iba sentong tembangba sülen "Insects for sustainability," "Rearing grasshoppers," "Hornet

domestication" aser "Towards sustainability onüktem nung sensak asem.

ATREE ya non-profit organization ka lir shirnoki conservation aser sustainability dak sendakba nung policy aser inyakyimtem metetdaksütsü atema shisatsü bendener.

Küm metsü dak tema ATREE-i local nungi global policy jenjang tashi nung social- environmental ken o dak sendakba nung inyaka aruogo

Tzü-mopung wazüka ayutsü aser tebandang makai terenlok asoshi bendanga agütsüba lokti ka adokdaksütsü ATREE nükla lir.

Sentong yanglurtem aser lokti-i lenla balala nungi shisatsü adokdaksütsü aser taruba putu atema environmental lenirtem anitetsü parnok nukjidong lir.

Parnok nukjidong ataloktsü atema ATREE-i, biodiversity and conservation, climate change mitigation & development, land & water resources, forests & governance & ecosystem services aser human wellbeing amala ken o tem balala benoka inyadkar.

March 12 nü Anungla Pongeni, "Know what insects we eat" onük nung ajemdaker jembitsü aser Dr. Amlan Das lenisüba kübok "Nutritional aspects of edible insects" onük nung technical session ka agitsü. Iba sülen tachila shiruru tilateritem jangjatsü atema tangazükba agütsütsü.

Nagaland nung 'Azadi Ka Amrut Mahotsav' sentong agitsü

Dimapur, Metsüremi/March 11 (TYO): India nüjiso ngur küm 75 ajungba nüngtem nung Azadi Ka Amrut Mahotsav sentong ya March 12, 2021 nü India Ato Kilonser-i Gujarat nungi tenzüksütsü.

India nung nüjiso ngur küm 75 ajungba benjongmung 'Azadi Ka Amrut Mahotsav' ya Independence Day 2022 atongtsü hopta 75 lia March 12, 2021 nü tenzüksütsü aser Independence Day 2023 tashi agitsü.

Iba 'Azadi Ka Amrut Mahotsav' sentong ya State aser Union Territories ajunga nung sayatsü aser yangji Indiai küm 75 tsüingta takok angubatem sayatsü aser kanga jangja memetebba nüjiso bushirtem (freedom fighter) indang otsü sayua nüburtem nem tali metetdaksütsü aser kin balalai shilem agibatam sayatsü.

Linük ajunga den külmil Nagaland nunga India nung nüjiso ngur küm 75 ajungba benjongmung 'Azadi Ka Amrut Mahotsav' sentong ya March 12, 2021 nü akumketa tenzüksütsü.

March 12, 2021 anepdang High School Junction, Kohima nungi Nagaland Civil Secretariat, Kohima tashi NSS aser NYK nungi volunteer 150 shi arua jajatsü.

Volunteer tem ya korang, t-shirt agir 'Azadi Ka Amrut Mahotsav' ta zülua aliba banner tem bener jajatsü.

Iba jaja ya Naga Civil Secretariat Plaza nung tembangtsü, kong volunteer tem den school tanurtem arua adentsü. Naga Civil Secretariat Plaza nungya anepdang 11:00 ako nungi sentong ka tenzüksütsü, kong sobaliba sentongtem aser linük nung ajemdaker ken tena tsüingsangtem sayatsü.

Iba sentong nung Nagaland Chief Minister ya alakteta jaoker ka ama arua adentsü. Yangji 'Celebrating 75 years of India's Independence' omen nung ajemdaker noksa sayutepba sentong ka Bureau of Outreach & Communication, Ministry of Information & Broadcasting ajanga ayongzüksü.

Item dak alia Nagaland nung aliba school ajak nung kaketshirtemi 'Events leading to India's independence from British rule and Role of various freedom fighters in it' omen nung ajemdaker ghonda ka Conference/Seminar/Symposium/Talk/ Webinar/Presentation ayongzüka agitsü aser ano 'Analysis of India's struggle for independence - different schools of freedom movement from 1857 to 1947' onük nung Essay Competition/ Creative Writing Competition alitsü.

Zhaleo-i Medziphema nung Silk Spinning Unit lapoktsü



Medziphema nung SHG Silk Spinning Unit lapoktsüba mapang Advisor Zhaleo Rio-i ribbon mejepba noksa nung angur.

Dimapur, Metsüremi/March 11 (TYO): Department of Sericulture, Govt. of Nagaland-i senotsü teyari agüja Zeal SHG atema yangluba SHG Silk Spinning Unit ka March 11 nü Advisor, Sericulture, Excise & Minority Affairs, Zhaleo Rio, IAS(Retd.)-i, sorkar ketdangsertem aser Medziphema nung lenirtem aser aluyimertem matsüngdang lapoktsüogo.

Sentong nung o jembiba mapang alakteta jaoker Zhaleo Rio-i, iba unit takok ngua amenoktetba atema Sericulture department aser Zeal SHG nem tenüngsang agütsü aser züngsemtem dang tarutsü nung iba unit tali ajungketshitsü atema tajungtiba agütsütsü mepeshi. "Medziphema subdivision atema iba ya kanga dang tongtibang anogo ka lir, kechiyong eri longben (silkworm farmers) metsürtem iba unit ajanga kanga ajangzüksü, ta pai ashiba den aluyimertem dang agri aser allied inyakyim ajak nung tongtibang shilem agitsü ajungshi.

Advisor-isa, aluyimer aser SHG na sendaktepteta iba unit tejakdangi bener aoba den tajangzük anguba centre ka

kümdaktsürasorkari maneni teyari agütsütsü nangzük. Department dang metsüjangnatsü tajung agütsütsü mepeshiba den cocoon amala eri product tem atema jenjang tajung agütsütsü mepeshi. Paisa, aluyimertem dang alu chia maparen tenzüksü ayongzük, ajita asünungdang mongpu ajungba mapang tajangzük aika ngutetsü, ta ashi.

Sorkar kijai ajak nembo mapa magütsütetsü ta shia, Zhaleo Rio-i private sectors nung nisung aika anioka inyaktetsü. Eri longben metsüba ya tatishitsü tajung ka lir kong kibong ajunga pei kidang ayong ayonga inyaktetsü, ta ashi.

Maneni Rio-i ashiba agi, longben tesepe nungi ang aintsü atema anogo 15 nungi 30 tsünga dang agir, koba mongpu dak keta lir, aser iba mapa ya sen talila aatsü atema lenmang tajung ka koba hobby mesera part-time mapa ama mashi kati inyaktetsü. Silk adokdaksüba dak alia eri longben metsüba ajanga tanga tajangzük aika angutsü ta shia, Rio-i eri longben pickle yanglua yur chitettsü aser bako tejang nungi agizükba totzü ya mozü lir, ta ashi.

Kasa mapang nung pai, beneficiaries aikati sorkar

scheme tem kanga züba züba agir ta shia, Sericulture department kübok aluyimertem nem longben metsütsü atema ki yanglutsü teyari agütsür, ajisüaka aluyimertemi küm jungnüa nungang item kitem mekazüker, koba kanga tezüdangtsüka aser iba amala inyakyim ajanga asenok rongsenketsüng raksar, ta ashi.

Pai aluyimertem dang kanga nendaka maneni inyaksü mepeshiba den sorkari mapang shidak nung takokba tashi teyari agütsütsü, ta ashi.

Iba sentong ya Deputy Director, Sericulture Vikehielie Pienyü lenisüba nung agi aser Joint Director, Sericulture Yashimeren-i sarasadema tenzük. Maneni Deputy Director, Sericulture Alemkumzuk-i Technical Information agütsü aser Zeal SHG lenir Megozomeü Khathe-i o tatsüka jembiba sülen DSO, Dimapur Mhianizoto Meyase-i tepela o jembi.

Department kübok terenlok asoshi sentong, project aser talisa Centre-i senotsü teyari agütsüba scheme tem aluyimertem atema bener arutsüba atema Advisor Zhaleo Rio dang kanga pelaba lemsatpe sentong leniri lemsatapa liasü.

DC & DEO Kohima ajanga e-EPIC download asütsü metetdaksü

Dimapur, Metsüremi/March 11 (TYO): Special Summary Revision, 2021 mapang tenüng zülüokba elector tasentem unique mobile number alirtem NVSP/VHA ajanga e-EPIC download asütsü atema Election Commission of India ajanga facility agüja lir, ta Deputy Commissioner aser District Election Officer,

Kohima, Gregory Thejawelie, NCS ajanga sangdong ka nung metetdaksü.

November-December, 2020 mapang electoral roll nung tenüng zülüoka aliba elector ajunga dang nvsp.in ajanga e-EPIC download asütsü metetdaksüogo.

Elector tasentem e-EPIC download asüba nung yaritsü asoshi tanabuba camp ya

Electoral Registration Officer, Kohima, ADC Tseminyu, ADC Chiephobozou, SDO(C) Sechu/Zubza, SDO(C) Jakhama, EAC Kezocha, EAC Botsa aser EAC Tsogin office tem nung March 12-13, 2021 anogotem office mapang ayongzüksü. Anungji elector ajungai pei indang e-EPIC ya iba camp ajanga download sütettsü, ta sangdong ajanga metetdaksü.



Frontline Ministries ajanga Longjang Baptist Arogo nung March 4 nungi March 7, 2021 anogo tashi Mother Heart Skool ayongzüka liasü. Iba sentong nung ketdangsürtem ya Rev. Dr. Toshi Langu aser Alemla Mozer na liasü. Mother Heart Skool ya English aser Nagamese oshi nunga agiteter.

DC, Kohima ajanga Gaon Buras tem dang metetdaksü

Dimapur, Metsüremi/March 11 (TYO): India nung nünso ngur küm 75 ajungba nüngtem nung benjongmung tenzükba sentong ka March 12, 2021 nü Secretariat Plaza, New Secretariat Complex, Kohima nung agitsü. Iba dak sendakba nung Deputy Commissioner, Kohima, Gregory Thejawelie,

NCS ajanga KMC densema Kohima Sadar Administrative Circle kübok Gaon Buras ajunga dang March 12, 2021 anepdang 10:30 ako nungi tenzükba Secretariat Plaza, New Secretariat Complex, Kohima nung agitsü aliba sentong nung arua adentsü metetdaksüogo.



Ao yimsen Baptist Arogo sannüker R. Imti Imsong-i züluba kaket; Otsü 100 Bongdang tanü March 11 nü Tir Yimiyim Yimo zülur K. Temjen Jamir-i sayatsüogo. Kaket sayaba sentong nung Arogo tenzükertem aser kinungertem dena liasü. Noksa nung kaketzülur Imti Imsong (tachichi) aser K. Temjen na kaket sayaba mapang tangokba angur. Iba kaket ya talinertemi sen 250 yong CLC Dimapur, OM Books, Dimapur, Eastern Book Depot, Mokokchung aser TDCC Publication, Mokokchung nungi alia züngtettsü.

Kohima nung School Health & Wellness Programme agi

Dimapur, Metsüremi/March 11 (TYO): Ayushman Bharat kübok School Health & Wellness Programme atema District level coordination cum Consultative senden mezüngbuba Deputy Commissioner, Kohima indang Conference Hall nung March 10, 2021 nü mena liasü.

Iba senden ya Deputy Commissioner aser Kohima nung iba Committee indang mendenpuba, Gregory Thejawelie, NCS ajanga ketdangsüa agia liasü.

Iba sentong indang metetpelaba mapang Chief Medical Officer, Kohima, Dr. Vezokholu Theyo-i ashiba agi, Ayushman Bharat: School Health and Wellness Programme ya Ministry of Health & Family Welfare aser Human Resource Development lungjemer tenzükba lir.

School tanurtem rongnung tashidak nungi kumzüka aser jenbua alitsü atema iba sentong ya Ayushman Bharat indang nokdang asemubaba lir. Linük nung sorkar meyong aser sorkari teyari agütsüba school ajunga nung school health promotion activities tem mapa kuma inyaksü.

Mezüng phase nung School Health Programme ya State/UTs 33 nung aliba district 191 nung mapa kuma inyaksü aser iba atema Nagaland State nunghi Kohima, Peren aser Kiphire district tem densema lir.

Iba senden nung Dr. Theyo-i India nung teinlonglong (adolescent) pur tensa indang onük benoka jembia liasü.

Iba sentong kübok School Health & Wellness Ambassador initiative indang lemsatpeba mapang, Dr. Theyo-i ashiba agi, school shia tesayur ana Health & Wellness Ambassador ama shimtettsü aser tena nem temang anema alitsü aser tashidak nungi kumzüka alitsü training agütsütsü aser hopta shia ghonda kaka jangrabangra aketba inyaksangshitem inyaktetsütsü.

Classroom nung amendaker inyaksangshitsü atema hopta shia ghonda 24 lemsar agitsü.

Senden nung Deputy CMO Kohima, Dr. Rupert Peseyie-ia School Health Programme ya school nung tanurtem nem arishi küm den apet health aser nutrition indang osangtem agütsütsü atema, takum tepiyong amshitsü atema tanurtem nem temang anema aliba yimyatam angazükdaksütsü atema, tanur asüdang tashidak puteta anepalutsü atema, tajemtsü tzü tajung shitetba aser tetsürtemi ita shilem müreka anepaluba, yoga ajungkettsü aser Health & Wellness Ambassador tem ajanga meditation agiba aser tanurtem atema health, wellness aser nutrition nung research agitsü ajungshitsü nükjidong nung yanglu, ta ashi.

Assam Congress-i 'Congressor 5 Guarantee' Yatra sentong tenzükogo



Guwahati, Metsüremi/ March 11 (Agencies): 'Asom Basaon Ahok' Yatra campaign takok nung agiba sülen Assam Congress-i Brehostibarnü state ajunga nung mega 'Congressor 5 Guarantee' Yatra sentong tenzükogo.

Iba sentong ya Assam Congress in-charge Jitendra Singh-i Jagiroad jila anasa Paschim Nagaon nung tenzüksü.

Iba anogo Congress-i rally tulu ka ayongzüka agia liasü.

Congress Lok Sabha MP Pradyut Bordoloi aser Gaurav Gogoi natia iba sentong nung shilem agia liasü.

""Asom Basaon Ahok' bus yatra takok nung agiba sülen party-i Assam kübok district 33 prongla nung constituency ajak nung 'Congressor 5 Guarantee' yatra sentong ayongzüka iba takok maneni bener aotsü," ta Assam Congress-i ashi.

Iba yatra tanabuba shilem March 13 nü Gaurav Gogoi lenisüba kübok Tezpur nung Haleswar temple nungi tenzüksü.

All India Mahila Congress tir Sushmita Dev-ia March 13 nü sentong ka anitsü koba Silchar kübok Gandhi Park nung agitsü.

Assam Rifles-i KNA (I) Commander-In-Chief apu

Aizwal, Metsüremi/March 11 (Agencies): Headquarters Inspector General Assam Rifles (East) kübok 23 Sector Assam Rifles, Aizawl Battalion-i March 11 nü KNA (I) Commander-in-Chief Veng, Zemabaw Thuampui tesem nung puogo.

Meita aoba sentong nung Assam Rifles sepaitem aser WEU 11 densema liasü.

Zemabaw Thuampui tesem nung KNA(I) telungpur munga aliba osang tejangja ka itangitertemi agütsüba sülen iba dak ajemdker sepaitemi iba tesem meita ao.

Security Forces tem mapang shidak nung jenjang tapet agiba ajanga KNA(I) Commander-in-Chief Nehjang Haokip puogo, shiba Bawngkawn Police nem bendanga agütsüogo, aser ken o meneni bushitsüngdangtsü.

PROGRAMME FOR CELEBRATION OF INDIA'S 75 YEARS OF INDEPENDENCE 'AZADI KA AMRUT MAHOTSAV'

Date : 12th March, 2021
Venue : Nagaland Civil Secretariat Plaza, Kohima

1100 Hrs : Hon'ble Chief Minister arrives

: Entry of marching group led by children

: Speech by Hon'ble Chief Minister

Cultural Presentation

: Song-and-Dance Display : *Maa Tujhe Salaam-Vande Mataram*

: Song-and-Dance Display : *Colours of Nagaland*

: Unity Dance by the Tribes of Nagaland

National Anthem

♦♦♦♦

CM Sonowal-i syndicate raj mazüokteter: Dilip Kumar Paul

Guwahati, Metsüremi/ March 11 (Agencies): Taoba Assam BJP lenir aser Assam Legislative Assembly ex-Deputy Speaker Dilip Kumar Paul-i state nung sorkar kümteter aliba party kanga mejungi aitsüogo.

Taruba Assam Assembly elections nung tokteptsü atema BJP-i ticket magütsüba sülen Dilip Kumar Paul-i party toktsü aser ashiba agi, state nung syndicate raj Chief Minister Sarbananda Sonowal tenizüng nung inyaksangshidar.

Dilip Kumar Paul-i, Assam nung BJP ya syndicates balala nung densema aliba nisungtemi anishir ta ashi.

Paul-isa, pai ochi mashi inyakyim balala nung shilem agitsü atema memulungba ajanga syndicates nung densema alirtem pa MLA ama maginer, ibayongji taruba Assam Assembly elections nung tokteptsü atema pa nem Assam BJP-i ticket magütsü, ta ashi.

"Syndicate raj matsüngdang CM Sonowal-i kecha minyakteter. Cachar nung asenoki BJP indang candidates list reprangdangra, temesepba mozü, prangbong hadir balala shibelenba nung teyari agütsütsüpurtem angutsü," ta Dilip Kumar Paul-i ashi.

"Ni Silchar nung BJP ticket ngura parnok atema tetsükdaktsü süla, anungji kü nem ticket magütsü," ta paul-i shisem.

Taoba Assam Assembly deputy speaker aser Silchar nungi MLA Dilip Kumar Paul-i Bodhbarnü BJP party tokja liasü.

Taruba Assam Assembly elections atema BJP-i Dipayan Chakraborty shimogo, shiba Silchar Lok Sabha MP Rajdeep Roy den kanga junga sendaktepa lir.

Dilip Kumar Paul-i Bodhbarnü, yimden yimsüsüba nung ajangzüksü atema BJP züngsemtem lemdangtsüba asoshi Silchar MP Rajdeep Roy aitsüogo.

Paisa, Barak Valley nung ochimashi inyakyim ka nung shilem agiba atema Rajdeep Roy aija liasü.

Paul aser Roy na mapang talangka mangatettep adoka aruba ajaki jangjaa lir.

Dilip Kumar Paul taruba election nung independent candidate ama tokteptsü.



Arunachal Pradesh chief minister Pema Khandu-i Monglobarnü Itanagar nung portable cinema theatre Digiplex lapoktsüogo. Chief minister Khandu den state home minister Bamang Felix nati sentong ka agi Picturetime Digiplex lapokja liasü.

Tripura BJP yongtsü nung mangatettep adoker

Agartala, Metsüremi/March 11 (Agencies): Tripura BJP yongtsü nung mangatettep adoker lir aser party worker aser party pusemer aikati taruba TTAADC elections atema BJP den longjemer aliba IPFT parnok partner ama agizüksü memulunger.

TTAADC elections nung IPFT pur tokteptsü aliba constituency tem nung BJP worker tem aikati teyari agütsütsü memulungba lemsatepogo aser ashiba agi, parnoki IPFT candidate magizüksü.

Party candidate khanga BJP workers temi constituency aika nung parnok indang office raksatsü aser party toktsütsü amokmerenogo.

West Tripura district kübok Mandai nung BJP worker temi osettsüt raksaja tensa mejungi akümba sülen Bodhbar aonung sepai talila yokogo.

TTAADC (Tripura Tribal Areas Autonomous District Council) elections atema IPFT den longjemba dak sendakba nung Tripura BJP tebilemtsü ka nungi tebilemtsü ka bendenlokyonga odar.

Temetettsükaji MP Rebati Tripura densema tribal tem aliba tesemtem nungi Tripura BJP lenirtemi TTAADC elections nung kija tokteptsü atema shia aruogo.

Ajisüaka Centre nung party lenirtemi kanga nongshiba sülen TTAADC elections atema IPFT den BJP longjemtsüsa aküm.

BJP-IPFT alliance-i tawa TTAADC elections atema candidates tem sangdongogo.

BJP menden 11 nungi tokteptsü aser IPFT menden 14 nungi tokteptsü.

Party anaprongla menden asem nung tokteptsü.



TIR YIMYIM

YIMOBILEM (EDITORIAL)

DIMAPUR ROGONÜ, METSÜREMI (MARCH) 12, 2021

APU TECHIREPER !

Koba rongsen aser koba oset südir süaka kibur mali ama toktsüra yakta tejen aser tamajung küma aotsü aser mamshitetsüsa raksadoktsü. Iba jagi, English nunger shin o nung, “ mapang shitak nung süoshi khen arüshiba agi tukuben arüshitsüba timtem aser takoksa nungi kümzüker,” ta jembir. Aji shitak lir, kechiyong asen meyong tula nung angjang ka tokdanga alidang arüshira, ano tanaben tasen ama akanga akümer saka angjang ka tokdangbaji kecha hau ta mali toktsüra, tula ajungaji shisayonga aotsü. Iba shin o nungi asenok Nagaland nung alirtem tangazüktsü tajung ka lir. Tanü asen lima nung nübortem asoshi yangluba government (public) lenmang, apu aser kiojen tajung kata mali melamelaa tejen akümba aser raksaa aoba ya, junga meyangluba kija agi masü saka yanglur külen kiburi temulung agüja anepalua mereprangba ajanga tejen aser tamajung kümdaktsüba tiemba lir. Aji oda, tanü asen lima tilaka nung ya government-i yangluba lenmang aser apu junga anepalua mereprangba ajanga lendong tulu ataloktsüsa alibatem rongnung Dimapur nung train lenmang temdanga yangluba, flyover, ana rongnung Hotel Tragopan lenjem nungi Burma camp kiyong tangshia yanglua aliba apu ya asütsü. Iba apu ya kodang tema aser telonglen anguoka repringdangdir, joko cement dak sottsü tashi mali ajak kakzüka alua angur. Aji oda, cement tangola temer kakzüka alur asünungji yin temai adoka song agi achi tenzüko. Apu temalen anatsülen cement agi railing yanglubatema ajak loksaa omadagi. Ano, apu anatsülen tetsüng agi jajatsü purtem aotsü atema yanglutsüba lenmang nunga joko tapok aika adokadoker, nisung jajatsü mejungi kümogo. Asenoki küm ana semka jakdang Dimapur lensa nisungtem toudak nung apu ka chirepba osang angashiogo, saka Tsüngremi meimba agi, iba lendong nunga Naga nungerbo kata masü aser kanga sashiabo meyiru. Iba ama kasa lendongji Dimapur nung dang masü saka Nagaland tesem aika nung ajurutsüsa anendaka lir. Joko, tesem aika nung gari lenmang kanga mejungi raksadagi. Item lenmangtem nungji tsünglu arudang motzü atsüngtsü aser iba tarokji mangu ser, talisa tetsüng ana aser asem aketba garitem lendong ajurutsü ana nung lir. Yimti tezülen lenmang majungbajibo yutsür, yimti tiyong nunga gari tilatembo temang tsükdaka yur moutetsüsa tesem aika mejungi kümogo. Idakji gari aika raksatsü aser nisung aika yirutsü. Item ajakji yutsür, Dimapur nung train lenmang kadang yanglua aliba apuji nisungtem toudak mapang ka chirep nungbo ta shisabolua bilemer. Atangji, tang amai kibur maliba oset ka ama kümer, shingaia mereprangi cement-a parnok kakzüka alunütsü alung, railing-a parnok loksaa onütsü oang aser alilen tip anatsülen shirnok ki yangluner, apu nungi mera ka mera nung kidangi kaotetsüsa kiojena yangluang ta, tang amai toktsü nungbo, memenui apuji chireptsü. Idangji, apu nungji nisung aika toudak asütsü, kechiyong apuji ajanga gari aser nisung mesenzüba mapangbo mali, amang agi sangwa küma aser sangwa agi amang küma jajar. Asenok yabo, khen bilemetsübo, yirarang mesük, kechiyong asenok lendong ajurutsüsa liaka, asenoki ola madok lendongji matalok tashi atar. Iba lenmang ya shir lenmang asütsü ? PWD asü Municipal meyong ? Ano PWD meyong asüyonga state-i asü mesüra Highway (PWD)-i repringtsü. Mesüra iba yaa governor-baisa repringtsüla ? Atangji, tula tuluka shisayonga maodang arüshiba amaji, lenmangtem ano tuluba raksayonga maodang aser apu mechirep dang, kiburi kibur mapa meteta anepalu yanglushitsüla. Ashiko, lendong atalokba mapangbo kiburjiang densemetsüa akok, kechiyong lendongibo kibur o pi na mebendangtetsü. Kechi mapa südirsüaka, nübortem asoshi inyakba aser yangluba mapatemji asen asoshi inyaker ta tulur tila na pronglai bilemetsüla aser angateta anepalutsüla.

OLEMSABANG

AO KIN NUNG TELOK PALALA NUNG RONGNIRTEMI (SENSO) ASER (LOKDI) OLONG ANA TETEZU MEMETET ZÜLUSAR .

~ K.Lima Longkumer

(Yashi adok nungi...)

SENSO NUNGI JENTOKBAPUR ATENTSÜBA TESEMJI

1. Tekülüm aser sentepi aotsü (Tamangba imsü nungbo artsü (Border) mali.
2. Town nung Governor / Chief Minister / Army ozüng aser Election nungbo parnoka oa atener (Item amala nübu kong dintir item atenba telok dangji LOKDI ta ajar.

2. YIMPUR CHANU ASER SENSO CHANU:-

- (a) Yimpur chanu :- Ake asen tsürabortemi arem min yateta yimtsüng kümteta mesemteter yimtsüng kodanga toktsür mao alir item dang yamai ajar.

1. Parnok dang küyi süh mojing süh aoker ta ajar
2. Parnok jagi Yimtsüng nung lendong aser khuret tulu arudang aremzüka dongbu apur .
3. Parnoki yim kümzüka ayur aser nüka alir .
4. Parnoki yim toktsür kodanga maor .
5. Parnok dangji yimkümer ta ajar .Parnok nungjagi imsüsür tejangja adoker. Anungji item dakümtem dangji yimpür janu (Impur) ta ajar .

- (b) Senso chanu -Yimtsüng nung alir ajakji senso tajung kaka lir saka ajaki yimpur chanubo masü.

1. RENTI (Yimkong) aser LOKDI ratet palala .

- (a) Renti (Yimkong) Yimtsüng nung imsüsür-i yimden mapa kar adokdang , yimyim ayima Oh asüng Yimkong /Renti Yim kongdanga nübu atsüktsü ta ayimmoktsür .Yimtsüng nung imsüsürtemi kodanga lokdi ta mayimmoktsür. Kechiyong parnok Lokdi atema imsusur masü ,parnokji Senso tajungtem asoshi imsusur lir .

Town nung alirtem senso telongjem nung atongsemertem bi tentet nungja koba official sua writing pad aser programme nung ajenloker saka aji tezelen nemzüka yutsür lokti sendong aser lokdi osang zünga ashitsü ta sendong nung zülusembaji nai senso telongjem nungja mezüngmeshir ta angatetdang.

Aor oshiopün tarok bushiba mapang nung ASLB-i anir Media Sabang ajak nung olong taret meyipsa amshiba anügosha angur.Laishiba nungi laishir aser Theologians/temi olong aika tai zülusemba azüngdang düzüdanga mezüngnue akümer .MTBA-i Anogoshia azungtsü kakut nunga (LEPA / Leplepa / Meleplepa züluba yakum 2020 june ita piyong adok nung ngugo ,adu kechi tütüzü -ar züngshiaka mangatet .

Tai Sürnung shidak ama amshiba Shidakba olong

1. Rongsenkütsüng (Tsüngdenba masü) Rongsenkütsüng (Züngzünga rizüngba agi takar aküm
2. Bushisungdang Bushitsüngdang (Tsüngsü abu)
3. Kaket Riju Kaküt Ruju (Aruju)
4. Ninok / Linok (Sickle) Lunok(Ya ake tsürabor-i jempiba)
5. Menoknok (Earthquake) Mulunok (Ya ake tsürabor-i jempiba) Ya tütüzü shidak jempiba lir.
6. Anogo Anügo (Anü adok ashe Ano adokba nibo Mangu.
7. Lung (Rock) ABAM -i Laishiba aser Long (Longtrok / Longpok / Longjakrep Khün kaküt nung lung ta tang zülua amshidar / Longkümer / Longchar / Longkong Vill / Longsemdang Vill / Longsa Vill (Ao) / Longsa Vill (Lotha) / Longkipe Vill (Sangtam) .Yamaji asen Aori dang masu saka danger kin ia long dangji long ta zulur .
8. Joko (Karibo Jiko ta amshir) Jogo ('K' masü 'G' agi melenang)
9. Semzük -Temetetter aekati olongji tai nung amshirar jogo tamshi ta songdemyonga mangar

- (a) Semzük -Dula temang nung semma aliba semzük

- (b) Sepzük -Half pant (Badülong / Longpant semma aliba sepzük / Tambor kati süjak akia aliba sepzük .

Akedang Yim ka nungi yim ka mesemma senshia aodang oshi-ji jempia jempia olasü tera palaka (abaraa) jempia or tanübo abaraa aoba oshiji osang kuküt dasüng zülur shidakba jempir nem itemji züngdaksür .Nür yimtsüng aser nür tzükongi jempibo olasü aser züluba oujang-ji Aor süngjeni makizüker

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tamangba yimsü balala nungi telok 120-i climate action atema akhanger



Australian Religious Response to Climate Change (ARRCC) züngsemtem noksa nung angur.

March 11, 2021: Climate Change atema taküm November ita nung COP26 Climate Summit agitsü lia linük aika nungi Khristantem, Muslim nunger, Yihuda nunger, Hindus nunger aser Sikh nungertemi alima nung yimten lenirtem dang climate change atema mapatong tulu atemzuka inyaksü asoshi takhangba agütsür.

Climate Change atema nendaka inyaksü asoshi takhangba agüja March 11, 2021 nü alima tesem balala nung tamangba lokti balalai anogo piyong Tenla kitem densema tekülem ki aika nung tsüngtsüng tema liasü. Tamangertemi iba anogo ya climate action atema tamangba lokti balalai longjemer ola adokba anogo tulutiba liasü, ta metetdaksü.

Greenfaith International Network nungi Campaign coordinator-i, tamangba lokti balalai linük 38 nung sentong 400 shi renema agiogo aser tamangba lokti balala nungi ajaki longjemer yimtenren lenirtem aser financiers dang fossil fuel infrastructure atema senotsü magütsütsü aser arem tulu achiba anentsü densema

climate action atema telemtetba tajung agia inyaksü mepishia metetdaksü.

Alima tesem ajungalen agiba campaign nung ya tamangba yimsü dak sendakba telok 140 dak temai shilem agir aser iba anogomong nung Khristantem, Muslim nunger, Yihuda nunger, Hindus nunger aser Sikh nungertemi tekülem kidang tsüngtsüng atemba aser süngdong atemba densema sentong aika ayongzuka agiogo.

Australian Religious Response to Climate Change tentetsang Khristan lenir, Thea Ormerod-i, "Tamangba yimsü kechaia alima tzü-mopung raksatsütsü atema majungshir, ajisüaka sorkartem, financial institutions aser tongtibang corporations-i ibaji inyaker. Asenok tamangba yimsü balalai tekülem kitem nungi ayazuka climate change atema ola adoktsüsa akümer," ta ashi.

Iba dak alia alima tesem balala nung tamangba yimsü lenir 200 dak temaia iba campaign pusemba metetdaksüogo. Parnok rongnung taoba mapang Canterbury nung tongti putir, Rowan Williams, Vatican

cardinal Peter Turks, Buddhist nunger kaketzüler, Joanna Macy, Muslim-American scholar Imam Zaid Shakir, African Council of Religious Leaders secretary general Francis Kuria, Religions for Peace group secretary general Azza Karam aser Religions for Peace group tatong Tir, Rabbi David Rosen nunger densema lir.

Southern African Faith Communities Environment Institute executive director, Francesca de Gasparis-i, "Alima nung climate action atema mapatong tulu benoka inyaksü nüngdaker. Climate change atema ozüng tesashi nüngdaker," ta ashi.

Tesüiba küm ishika nungi tenzüka alima nung tamangba yimsü dak sendakba tentet balalai climate action atema tongtibang shilem agia arudar. November ita nung 350.org-i asadangtetba agi, climate change atema tenangzükba agia inyakerem rongnung tentet pezü shia nungi kabo tamangba yimsü dak sendakba tentet lir. Pope Francis, Dalai Lama aser Islamic lenirtemia yimtenren lenirtem dang climate action atema inyaksü ajungshiogo.



Alima ajunga den jangyu medema Ao Baptist Church Diphupar, women department-i achaayanga March 8 nü International Women's Day mungogo. Noksa nung sentong nung adenertem tangokba angur.

ANO GO ABEN TSÜNGREM DEN

Khrista asoshi timtemji tenla tulu

"Anungji nenok rishikangshi aser timtem ajak, koba nenoki aremzüker. Item nung nenok tamang aser taremzüka asoshi Tsüngremer arogotem nung onoki nenok asoshi tejak tenteter."

(I Thesalonika 1:4)

Shiangaia timtem asoshi pela mebilemer, ajaki takok mesüra konang ka asoshi dang pelar aserajak tenteter. Saka yangi tanyar Paul aser külem tenzükertemibo Khrista asoshi rishikangshi aser timtem nung aremzükbaji tepelatsü osang ka ama züngshi. Kechiyong Kibuba asoshi timtem aremzükbaji tenla tulu ta züngshir. Adangji Thesalonika arogopurtemi aji kuli süa sayuba ngua Paul aser tenzükertemi arogopur den iba asoshi pelatepba angur. Thesalonika arogopurtemi pei ajangzüktsü asoshi mesüra maksü, timtem nung jenbutsü bilema liasü asübo Yisu Khriata doktsür lila. Khrista asoshi timtem aremba ya kecha tajangzük mali ta shir lila. Saka parnoki iba lima nung Khrista asoshi timtem maksüji tajangzük ama züngshi nung parnoki aremzüktet. Kibuba atema nai timtem, tatalaba, nükztü tia ajurur asü? Nai aremzükra aji Kibubai pa asoshi tenla tulu ama züngshir. Kibuba matsüngdang rongsen tenlaji masü, saka taküm yimya agi tenlabaji tenla tulutiba. Khrista tenüng nung nai timtem aremogo? Tayang küpzüktsü nai aremogoma? Mezüngmeshi aremogoma? Nai tenla tulu benogo.

Sarasadem

Kibuba Yisu, nai ni asoshi timtem jenti aremogo. Ni na asoshi timtem, tejashi tatalaba item ajak aremzüka tenla ama agütsür. Amen

Madhya Pradesh nung Anti-Conversion ozüng tasen ka agizük

March 11, 2021: March 8, 2021 nü Madhya Pradesh Legislative Assembly nung Madhya Pradesh Freedom of Religion Bill, 2021 agizükogo; state nung anti-conversion ozüng tasenba yagi January 9 nü agizükba ozüng melentsü. Ozüng tasenba kübok tamangba yimsü melenshinertemi anogo 60 jelia district administration nem metetdaksütsüla aser tamangba yimsü meyipdaksüba ketdangsüa agirtemia anogo 60 jelia district administration nem metetdaksütsüla. Iba ozüng kübok aibelenertem küm 3-5 tashi tepuokdak ayutsü aser senchi 50,000 tashi achitsü.

Iba dak alia kangshia tamangba yimsü meyipdaksürtem küm 1 nungi 5 tashi tepuokdak ayutsü aser senchi 25,000 tashi achitsü. Tanurtem, tetsürtem aser Scheduled Caste mesüra Scheduled Tribe nisungtem kangshia tamangba yimsü meyipdaksürtem küm 2 tashi tepuokdak ayutsü lateta liasü saka Freedom of Religion Bill, 2021 ozüng tasenba kübok Arrla 3 ajanga küm 10 tashi tepuokdak ayutsü latetogo aser senchi 50,000 tashi achitsü.

India nung Hindu nungertem Khristan yimsü

mesüra Islam yimsü dangi meyipba nokdangtsü atema linük nung anti conversion ozüngtem ya benoker.

Hindu yimsü alia amangertemi, India nunger Khristantem aser Muslim nungertemi sensaker Hindu nungertem mesüzüka mesüra ashiokja tamangba yimsü meyipdaksür, ta tai tongloksür. India nung anti-conversion ozüng ya Odisha, Uttar Pradesh, Arunachal Pradesh, Chhattisgarh, Gujarat, Jharkhand, Himachal Pradesh aser Uttarakhand state tem nunga benoka lir, aser item ozüng nung ajemdaker Khristantem aser Muslim nunger anema inyaker.

Taküm January ita nung iba ozüng benokba sülen Madhya Pradesh nung Khristantem reshikangshiba kanga bulua kümogo.

International Christian Concern (ICC)-i ashiba agi, taküm January ita nung Madhya Pradesh nung anti-conversion ozüng benokba sülen state nung Khristantem anema inyakba tatalokba 48 liasü. State nung Khristantem anema inyakba rongnung, Khristantem dak azükba, tiyazü nung tai tongloksüba, amokmerenba aser Tenla kitem shibangtsüba densema lir.

OLONG PAITEP # 5750

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

TIPIEN

1. Yakob tetsü - (6)
 4. Mezüng nisung - (4)
 6. Tasen lai kakat ka - (5)
 9. Au lanu - (2)
 12. Tejen lai 21 buba - (11)
 15. Tekolak tembar - (2)
 16. Zütsüra anepsang - (5)
 17. Kain tenu - (4)
 18. Hana-er jabaso - (6)

LANGTSÜNGLEN

2. _ _ _ gki - (3)
 3. Telungpur telok ka - (2)
 5. Tsüngremi mezüng poktetdaksüba - (5)
 7. Tia - (4)
 8. Yakob-er jabaso ka - (5)
 10. Abraham tebutü - (4)
 11. Rebeka kinungpu - (4)
 13. Esau tenu - (5)
 14. Tzünglu tilala aru - (4)
 16. Jafet tebu - (3)
 17. Teka agi kongshi - (2)

OLONG PAITEP # 5749 TELANGZÜBA

TIPIEN :

2. Pongsen, 5. Lepko, 7. Omen,
 8. Maongka, 10. Yangkhu,
 12. Senpong, 14. Angu, 15. Raksa,
 16. Arameso,

LANGTSÜNGLEN :

1. Alimang, 2. Pongen, 3. Samaru,
 4. Nün, 6. Pio, 9. Nüngdak, 10. Yongya,
 11. Kongro, 13. Ora, 14. Ata.



MANGA-IBO TESHINEM MENEMBA JAKA NUNG DANG LINÜR :

Sobangba : Hai temba Alok...Otsüla-oboula nunger shin o ka nung Manga (House Fly) ibo teshinem alidak dang linur ta ashiba ya kechi tetezü akaaa...???

Alokba : Ena temba...Manga yagi kong teshinem/tezükknem tamajung menemer idakji dang linur...Yamaji asenok nisunger rongnunga nisung karibo mapa tajung maginur...Tajung memeimer....Oda loktiliba ajak nung teti kati ka arishitepa, tsükchitepa pesaperonga dang linür...Telongjem aser yimjung nung sungjem sungjema melinür...Ajiser telemsa/teraksa telok nungji dang pa/labou linisüba maongka agitsü jangraba nisung karbo lir...iba ama nisung dangji Manga-i teshinem menemdak linuba ama ta shin o jembir adi.

Sobangba : Ayyyaaa...Temba aji kanga dang shitaka...ni tangjiang angajemogo.

Lilir : L.Kika Pongener.

TANÜBO NAI LANGZÜANG

Q. International Year of Millets bangzüng ya linük 193 nungi linük ____ agi pusemer.

A. 70

B.75

C.80

D.81

===== (Taruba adok nung onoki langzüksü)

YASHI ADOK TELANGZÜBA : Inter-band cascade light emitting device

AO OSHI ANGAZÜKDAK:

TANÜ ANGAZÜKTSÜBA OJANG

Aon

(n) Chi den külemi achitsü atema metsü mersü enoka renemb: chiyongtsü. (curry)

* Ozü kidand kütsü aon kanga junga asor.

Aon

(v.) Süng lung yokba (throw)

* Tanurtemi ak dak long agi aon.

Aon

(v.) Mopong arakzüba (wind blowing)

* Joko iba ita nungibo mopong aon tenzüker.



Tir Yimyim



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

Tepela
Tasoba Anogo



NAI-A YA METETTER MA?

Taoba küm (2020) October ita Australia indang Great Barrier Reef nung Empire State Building (New York) aser Petronas Twin Towers (Kuala Lumpur) dang nungi talangba 'reef' ka scientist temi ngutet. Iba reef ya meter 500 (süklep 1,640) talang lir. Scientist tem tzüym telung nung 3D mapping yangluba mapang iba reef ya nguteta liasü. Iba reef bushisüngdangtsü atema scientist team kati tzü telung nung senzüba robot ka amshi. 'SuBastian' ta nungja agütsüba robot ajanga live-streamed video yok aser alima dang sayutsü asoshi Youtube sabang nung iba video upload sütsü.

SUDOKU # 5791

7	2	3							7	5	2	1	4	8	6	9	3
	9		6	2	3	1			8	6	3	9	7	2	4	1	5
		1		8		2		3	9	1	4	3	6	5	8	2	7
5	1				2		7		6	2	7	5	9	4	3	8	1
	6	2				5	9		5	4	8	2	3	1	7	6	9
	4	7		3			2		1	3	9	7	8	6	2	5	4
			9				6		2	7	1	6	5	3	9	4	8
2			3			7	1		3	8	5	4	2	9	1	7	6
4			2	5					4	9	6	8	1	7	5	3	2

TELANGZUBA # 5790

OJANG LUTEP # 5337

- JUTANG :
 ANDG :
 MBJEI :
 NGJYOIA :
 AJUNTAMG :
 GDAN :
 ILEMBERI :
 NGTAJU :
 DANGKOA :
 ZÜKTMAGISÜ :

OJANG LUTEP TELANGZÜBA # 5336

ANOGO SHIA TEMANG MERÜKMEJUA ALIBAJI KANGA
 JUNGER ANUNGJI YAMAJI INYAKDI

TAN HOPTA ATEMA - KOMA SÜLA ?

Q. Asenok sobaliba nung ali senmang amangtepba yimya ya, akhi tsürabur senmang aser tanü putu senmang ta ana küma bendanger amangtsü tenzüker nunga koma süla?

Olong 20 shi nung March 12, 2021 tashi nung iba telangzüba ya onok dangi (e-mail - tiryimyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.

Wheelchair nung mener election atema nüboyimtsü: Mamata



Kolkata, March 11, 2021: Bodhbarnü Nandigram district nung West Bengal chief minister aser Trinamool Congress tongti, Mamata Banerjee tetsüing yiruba sülen la Kolkata nung aliba SSKM hospital nung amongba noksa nung angur.

Kolkata, March 11 (Agencies): Bodhbarnü West Bengal chief minister aser Trinamool Congress tongti, Mamata Banerjee-i Nandigram semdangba mapang la yiruba sülen la Kolkata nung aliba SSKM hospital nung mongdar; Brihostibarnü lai hospital nungi video osang ka ajanga, lai wheelchair nung mener asüyonga election atema nübo ayimtsüa akok, ajisüaka lai nüboyimba sentong ka danga methitsütsü, ta metetdaksü.

Taruba anogo 2-3 tsüingda lai election atema nüboyim tenzüksü; tangari la yirutsüyonga tangar anema meinyaksüla, ta lai party nung inyakertem ajungshi.

"Yashi ni kanga mejungi yiru

aser ni timtem nung lir. Ni teku aser tekolak naprongla ashir. Taruba anogo 2-3 tsüingda ni maneni nüboyimtsü. Kü tetsüing nung zübo manep saka ni nüboyimtsü. Ni senden ka danga methitemtsü. Mapang tatsüka atemabo ni wheelchair amshitsüsa akümtsü, anungji kü den amalitepa lidaktsüner," ta lai mepishia metetdaksü.

SSKM hospital osang ka ajanga ashiba agi, la tetsüing tabelen tenüklang anasa teret raksa aser tanga 'muscles'-a raksaogo.

Mamata yirutsüba dak sendakba nung TMC-i state chief electoral officer nem ken o ka agütsüogo aser BJP tetuyuba nung ajemdaker election commission-i state's

director general of police agien, ta TMC-i aitsü.

Brihostibarnü BJP lenirtem-Samik Bhattacharya aser Tathagata Roy nati Mamata semdangtsü atema SSKM hospital-i ao, ajisüaka doctor tetuyuba nung ajemdaker Mamata Banerjee amongba takdangi aitsü tena dang memelai liasü.

March 12 nü Delhi nung TMC Parliamentary telok kati Election Commission ajurua Nandigram nung Mamata yiruba indang benoka jembitsü.

West Bengal nung March 27 nungi tenzüka shilem ti lemsar assembly election agitsü aser May 2 nü vote zünga election osang sangdongtsü.

Linük nung meshimetsür timtibaji West Bengal aser UP na nung lir

New Delhi, March 11 (Agencies): Brihostibarnü Centre sorkari linük nung meshimetsürtem indang osang tejangja metetdaksü.

Lok Sabha nung Social Justice Minister, Thawar Chand Gehlot-i, Union ministry of Social Justice data nung ajemdaker linük nung meshimetsür lakh 4 shi lir, ta metetdaksü.

Linük nung meshimetsür timtiba aliba state ji West Bengal lir, iba sülen tanabuba state ji Uttar Pradesh aser tasembuba state ji Bihar lir.

Lakshadweep nungbo meshimetsür 2 dang lir.

Minister-i ashiba agi, tang India linük nung meshimetsür ajak senteper 4,13,670 lir, aser parnok rongnung tebur 2,21,673 aser tetsür 1,91,997 lir. Iba data ya 2011 census nung ajemdaker yanglu. West Bengal, Assam aser Manipur state tem nungbo meshimetsürtemji teburtem dang nungi tetsürtem timba lir.

West Bengal state nung meshimetsür 81,224 lir, Uttar Pradesh nung meshimetsür 65,835, Andhra Pradesh nung 30,218, Bihar nung 29,723,

Madhya Pradesh nung 28,695 aser Rajasthan nung meshimetsür 25,853 lir.

Dadra Nagar Haveli nungbo meshimetsür 19 dang lir, Daman & Diu nung 22 aser Andaman & Nicobar islands nunga meshimetsür 56 dang lir.

Union territories rongnung meshimetsür timtibaji New Delhi nung lir (2,187), iba sülen Chandigarh nung meshimetsür 121 lir.

Northeast states rongnung meshimetsür timtiba aliba state ji Assam lir (22,116) aser ishitibaji Mizoram (53) nung lir.



Dehradun, March 11, 2021: Brihostibarnü Dehradun nung taoba mapang Chief Minister, BC Khanduri-i tang tasen shimba Uttarakhand Chief Minister, Tirath Singh Rawat nem tetushi agütsüdang tangokba noksa nung angur.

Aluyimertemi March 26 nü linük tesem ajaklen longkak aittsü

New Delhi, Metsüremi/ March 11 (Agencies): Centre sorkari benokba aluyimba ozüing tasen anema longkak aitba tenzükler ita pezü ajungba nüngtem nung aluyimertemi March 26 nü linük tesem ajak mokdang longkak aittsü.

Aluyimertemi Delhi arrtsülen longkak ait tenzükler ita pezü ajungba nüngtem nung Samyukta Kisan Morcha (SKM)-i Bharat Bandh ayonger, aser iba anogo nungji aluyimertemi aluyimba ozüingtem rongdokba densema sentong balala agitsü.

Aluyimertem lenir, Buta Singh Burjigill-i, March 15 nü aluyimertem unions aser trade unions longjemer linük nung toztü jenjang kanga atuba aser railways privatize asüba anema longkak aittsü, ta metetdaksü.

"Petrol aser diesel toztü den LPG jenjang atuba anema district magistrates nem temepishiba shidi agütsütsü aser railways nija nem

agütsüba anema linük nung aliba railway station ajak nung longkak aittsü," ta Singh-i ashi.

"Onoki March 26 nü aluyimertemi linük tesem ajak mokdanga longkak aittsü, iba anogoji onoki longkak aitba tenzükler ita pezü ajungba anogo lir. Anepdang nungi aonung tashi longkak aittsü," ta paisa shisem.

March 19 nü aluyimertemi "Mandi Bachao-Kheti Bachao" amongba den Bhagat Singh, Rajguru aser Sukhdev nunger 'Shaheedi divas' amongtsü. Kasa anogo nungjisa lanurtemi aluyimertem pusama Delhi arrtsülen longkak aitba nung shilem agitsü.

Aluyimertemi March 28 nü 'Holika Dahan' anogomong nung aluyimba ozüing tasen asem indang kaketterem rongdoktsü, March 11 nungi Bihar nung "Kisan Yatras" tenzüksü aser March 18 nü Kisan Kranti Divas anogomong nung tembangtsü.



March 11, 2021 nü Mumbai nung nurse kati Maharashtra Chief Minister, Uddhav Thackeray nem COVID-19 vaccine tutsüba noksa nung angur.

Küm 5 tsüingda election mapang Congress MLA 170-i party toktsü

New Delhi, Metsüremi/ March 11 (Agencies): 2016 küm nungi 2020 küm tsüingda India linük nung elections agiba mapang nung Congress Party MLA 170-i party toktsür tanga party balala nung aden; kasa mapang nungjisa (2016-2020) election mapang nung BJP nungibo MLA 18-i dang party toktsür tanga party balala nung aden, ta poll rights group-Association for Democratic Reforms (ADR)-i metetdaksü.

2016-2020 küm tsüingda election mapang MLA 182-i pei party toktsür BJP nung aden, MLA 38-i pei party toktsür Congress nung aden aser MLA 25-i pei party toktsür Telangana Rashtra Samithi (TRS) nung aden, ta ADR-isa metetdaksü.

2019 küm Lok Sabha election nung Lok Sabha MP 5-i BJP toktsür tanga party nung aden aser 2016-2020 tsüingda Rajya Sabha MP teneti Congress toktsür tanga party nung aden.

"2016 küm nungi 2020 küm

tsüingda elections mapang nung Congress MLA 170-i party toktsür tanga party tem nung aden; kasa mapang nungjisa election mapang BJP toktsür tanga party nung adener BJP MLA bo 18 dang liasü," ta parnokisa metetdaksü.

"Tawa Madhya Pradesh, Manipur, Goa, Arunachal Pradesh aser Karnataka State Assemblies nung sorkar chirepbaji MLA temi pei party toktsüba ajanga liasü," ta ADR-i metetdaksü.

2016-2020 küm tsüingda re-contest asür Rajya Sabha MP 16 nungi MP 10-i pei party toktsür BJP nung aden aser 2019 küm Lok Sabha election nung Lok Sabha MP 12 nungi MP 5-i pei party toktsür Congress nung aden.

National Election Watch aser ADR-i tesüiba küm pongu tsüingda election mapang party melenertem aser election nung re-contest asür MP aser MLA 433 indang election affidavits asadanga iba osang ya renema liasü.



OFFICE OF THE MOLUNGYIMSEN LAISHIR TELONGJEM

Nukjidong : "Khrista Pukhüm"

P.O. Tuli, Mokokchung, Nagaland. Pin 798618

Date: March 11, 2021

To,

1. **Executive Secretary
ABAM Impur.**
2. **ABAM Sanen Luden
C/o President ABAM.**

Sub: **ABAM-i "Mary Mead Clark : Her life and Legacy" Kaket nokdangba (Ban) agentsü atema.**

Teti akhümtsüba aliba lennir tajungtem,

ABAM office nungi social media balala aser Tir Yimiyim (Ao osangkaket) March 3, 2021 adok nung Narola Ao McFayden-i züluba kaket "Mary Mead Clark: Her Life and Legacy" nokdangba (Ban) ta sangdongba aser ano March 6, 2021 nü Tir Yimiyim adok nung kasa sangdong jangjashia adokba ngua kanga aoksar aser mepelar.

ABAM Sanen Luden ashijabi Dr. Clark Naga tenemi mezüing atuba anogoji ABAM-i amshia aruba anogo den balala asüba agi kaketi ban (nokdangba) sütsüogo. Saka iba kaket nung aliba recordji Mary Mead Clark meyong diary nung aliba lir. Anungji ABAM-i amshia aruba anogo den balala süra kaket zülur den angatettepba jangjatsü tim masü na? Ibaji meinyakdang anogo balala asüba mechi iba ama kanga tongtipang kaket ka khenyongi menendoktsüba yabo ABAM-i kanga tashiyim inyakogo ta angateter. Kechiyong Arogo otsü (record) balala bushiloka aotsü (research) atema ABAM-i tamalen nungi lenmang lapokja lir.

Molungyimsen Laishir züngsem Dr. Narola Ao McFayden-i timtem arema mapang aser rongsen jenti endoka bushitba record-tem agi kaket küm Clark Theological College (CTC) nem angati tenla agütsüba nüngshi mapa agi menendokba oset ka kümdaktsüba yabo kanga tim masü. Kaket züluri temeten bushitsüba kümra ABAM asoshi kanga tesasatsü ta bilemer.

Anungji tanü nenok nokdaka alir lennirtem mapang nungsa iba tenokdangba (Ban) ya tangsa (immediate) meyipba agentsü mepishia zülur.

Molungyimsen Laishir Telongjem Tenüing nung,

Sd/

**J Meren Tzudir
President MLT**

Sd/

**P Anungla Sanglir
Secretary MLT**

Myanmar nung mitkar anema longkak aiter ti khaset

Naypyitaw, Metsüremi/ March 11 (Agencies): Lenir menden nungi atsüngdoker alila Aung San Suu Kyi-i ozüing alema senotsü agizük, ta Myanmar mitkar sorkari Brehostibarnü tai tongloktsü, aser mitkartemi sorkar atsüngdokba anema longkak aitdak security forces temi injang khaloktsüba mapang nisung ti khaset, ta tenük kuli alirtemi ashir.

Myaing jila nung sepaitemi longkak aitdak injang khaloktsüba mapang nisung trok asü, ta iba longkak aitba nung shilem agir kati osangbener dang telephone ajanga ashi, shibai yaria nisung tasümayang ya mozü kidangi anir ao. Yangji aliba health worker katia nisung trok prong süogo, ta ashi.

"Onok ajem ajema longkak ait. Parnoki iba ama mapa inyakba ya ni mamanger," ta iba nisungba yagi ashi.

Nisung ka Yangon yimti kübok North Dagon district nung tepset, ta ashi. Facebook nung noksatem lemsatepba nung nisung ka tekolak nungi azü yima lenmang nung mejanga aliba nguogo. Mandalay nunga nisung ka asüba osang lir.

February 1 nü Suu Kyi'er sorkar atsüngdokba sülen security forces temi nisung 60 dak tema tepsetogo aser nisung 2,000 shi puogo, ta advocacy group, Assistance Association for Political Prisoners ajanga Bodhbarnü shia liasü.

Mitkartemi longkak aiter anema tashiyim amshir aser nisung asür ya aika ozüing agi memelai tepsetba lir, ta Amnesty International ajanga mitkar aitsür.

"Ibai mazüoktetba masü, sepa tanishirtemi telemtetba tai agiba lir," ta iba telok indang director of crisis response, Joanne Mariner-i ashi.

"Item ya tai nangzüktsü mebilemba sepa tanishirtemi lir, shirnoki nisung meimchir anema mapa tamajung inyaka par sepaitem yok aser yimjak nung nisung tepsetba yimya amshir."

Mitkar indang odongtar Brigadier General Zaw Min Tun-i osangbener senden ka nung, security forces tem tazüokba nung lir aser nüngdakba mapang ang tashi amshir, ta ashi. Tesunep maliba ya linük balala asoshi tebilemtsü masütsüla aser anüolen linüktemi bilemba ya meshidak, ta pai ashi.

Taoba mapanga mitkartemi, rongrong adoka longkak aiter azüokba maparen nung taremkükba sayur, shirnoki police dak timtem agütsür, ta shia liasü.

Suu Kyi sorkar nung aliba mapang sen \$600,000 shi ozüing agi memelai meshi, ta taoba Yangon chief minister Phyo Mien Thein-i ashishiba ken o benoka lir, ta Zaw Min Tun-i ashi.

"Pai ibaji tashi agi shiogo. Item kuli ya onoki aiben jangjatepogo. Tang anti-corruption committee ajanga maneni bushisüngdang," ta odongtari ashi.

Tir Win Myint aser cabinet minister kar ochimashi maparen nung shilem agi aser tiri election commission dang election nung tim masü mapa inyak ta mitkari osang agütsüba nung manidaktsü ajungshi, ta pai ashi.

Mitkartemi sorkar

atsüngdokba asoshi temeden kuli agüja ashiba agi, Suu Kyi'er National League for Democracy ajanga akokba November election nung ashikülak mapa inyak, koba electoral commission-i magizük.

Mitkartemi election magi tashi ketdangsüa atatsü, ta Zaw Min Tun-i nenshia ashi. "Asenok tejangja democracy lenmang nung lir," ta pai ashi.

Taoba mapang mitkar lenirtemi küm ka majungdang election tasen ka agitsü nangzuka lir, saka anogo latetja mali.

Longkak aiter anema azüdokshiba asoshi UN Security Council ajanga Bodhbarnü aitsü aser mitkartem dang tazüokba alitsü ajungshi.

Saka China, India, Russia aser Vietnam linüktemi anema nokdakba mechi Britain-i züluba sangdong nungi tarutsü nung mera agitsü amokmeren ojangtem indoker liasü.

Security Council ajanga sangdongba nung ajemdaker mitkartemi tepuokdak alir ajunga chiochtsü aser November election ya akhümtsüputsü imlar, ta UN Secretary-General Antonio Guterres-ia ashi.

Linük nung yimjung lidaktsütsü mechi inyakba maparen nung yaritsü mechi Arakan Army (AA) telungpuri lendong agütsüba anenba ajanga parnok kiralongrar tenüingtem nungi agienogo, ta Myanmar sorkar sangdong ka ajanga ashi.

Arakan Army ya anüolen Rakhine state nung tashi tuluba aginüa rarar aser mitkartem atema tebilemtsü tuluba kuma liasü.

Magufuli kechi jenjang nung aliar metetdakjang: Tanzania opposition

Dodoma, Metsüremi/March 11 (Agencies): Hopta ka dak tali yimjak nung mongui alisang Tir John Magufuli temang kechi jenjang nung aliar metetdakjang, ta Tanzania opposition temi akhanger, shibai coronavirus züzüa agizük.

COVID-19 nungi sarasadem agi kumzükogo, ta ita aika jembia arusang arishi küm 61 tain Magufuli yagi mask agiba aser lockdown meratem benoktsü memolunger, saka semi-autonomous Zanzibar indang tatong tir ya virus agi asü ta temai adokba sülen taoba ita paia virus ya anosa lir, ta shia liasü.

"Taoba tir Jakaya Kikwete prostate surgery agidang asenok nem metetdaksü. Taoba tir Benjamin Mkapa hip replacement agidang asenok dang ashi... Magufuli indang metettsü asenok dak kechi agi malang?" ta opposition lenir Tundu Lissu-i Twitter nung Mongulbarnü zülutsü.

Saka Kenya indang Daily Nation osang kaket nungbo, face mask aser public health meratem agitsü memolungba linük ka nungi African lenir ka Nairobi Hospital nung lir, ta sangdong.

Mozüki nung Magufuli lir asü, ta asüngdang dang, 'onoki memetet' ta mozüki ketdangsür kati osangbener dang ashi, aser Kenya sorkaria iba osang ya magizük.

"Temang nung timtem alibatem ya nija tebilemtsü lir, saka nübur lenir atemabo nüburtemi metettsüla. Onoki osang tejangja ajakbo maginer, saka lenir ya shiranger asü mozüki nung aliar ajibo metettsüla," ta opposition party Alliance for Change and Transparency (ACT Wazalendo) indang secretary-general, Ado Shaibu-i osangbener dang ashi.

"Kodang nai iba amala osang laoktsür, idangji menüngdakba nung tsüpuba aser olulu prokshiba ajemdaktsür."

February 27 nü Dar-es-Salaam nung aliba State House government office nung linük indang secretary of state tenangzüktep agidang anguba sülen Magufuli yimjak nung mangur.

Tanzania sorkari Magufuli indang osang kecha sangdonga mali, saka Information Minister Innocent Bashungwa-i media aser nüburtem dang olulu tem osang tejangja ama mamshitsü Bodhbarnü shia liasü.

Tanzania-i coronavirus data indang osang sangdongba maparen April 2020 nung anen aser January ita iba tashidak atema mozü ya lendong aketba lir, ta Magufuli-i ashi.

"Mozü ya majung. Mozü ya junger asübo temesüing nisungtemi HIV/AIDS atema mozü alir lila," ta pai küm ka tejakdang shia liasü.

Ivory Coast Ato Kilonser Hamed Bakayoko süogo



Yamoussoukro, Metsüremi/ March 11 (Agencies): Ivory Coast Ato Kilonser Hamed Bakayoko ya Germany nung aliba Freiburg yimti nung temang anepaluba mapang cancer agi asü, ta sorkari sangdong ka nung ashi.

Pa Bodhbarnü asüba osang ya pa sor küm 56 junger anogo ana sülen aser pai melenzüksang sür ita ti shi lir angashir.

"Asen linük mangyim nung lir. Temolung zürepä Ato Kilonser Hamed Bakayoko cancer agi Germany nung asüba osang ni sangdonger. Pa ya sorkar ketdangsür tajung, asen lanurtem ranglokdkak, dangar dang aria bilemba aser ajemaluba nisung ka liasü," ta Tir Alassane Ouattara-i Twitter nung zülutsü.

"Pa ya yimtenren nung tongti asayar ka aser lungjemdaktsüba nung shilem tulu agir ka liasü," ta opposition Ivorian Popular Front nungi odongtar Issiaka

Sangare-i ashi.

Arishi küm 79 tain tir indang tembar tajung Bakayoko ya ajungbena Amadou Gon Coulibaly asüba sülen 2020 küm July ita ato kilonser shimtet.

Pa temang anepalutsü atema February 18 nü Francs-i anir ao aser yangji anogo ishika mungzüker Germany southwest tsütsü Freiburg-i anir ao.

Ouattara-i taoba hopta France semdangba mapang Bakayoko ajuru aser pa temang jenjang asadanger maneni mozüki nung amungtsü shia liasü, ta sorkari Hokulbarnü sangdong ka nung ashi.

Hombarnü Ouattara-i Bakayoko melen pa den yariteper aser chief of staff, Patrick Achi ya interim prime minister inyaktsü shimteta liasü.

Kasa mapang tir indang tenu tanubosang Tene Birahima Ouattara ya interim defence minister inyaktsü shimtet.

Pangnyu Phom-i Longleng District Hospital nüngshilong azüngtsü



Longleng, Metsüremi/March 11, 2021: Bodhbarnü (10.03.2021) District Hospital, Longleng atema Minister Pangnyu Phom-i nüngshilong azüngtsüba sülen ketdangsür aser tongtibang nisung tem den külemi tangokba noksa ka yangi angur.

Longleng, Metsüremi/ March 11, 2021 (TYO): Bodhbarnü (10.03.2021) Minister for Health & Family Welfare, S. Pangnyu Phom-i Longleng District Hospital tasen lapoktsü aliba tesem nung nüngshilong azüngtsüogo, ta sangdong ka ajanga metetdaksü.

Phom nunger ya yimjiyung meimba nūburtem lir, anungji district kübok lenla ajunga nung terenlok alitsü atema asenok ajak maneni longjemmer inyaktsüla, ta Pangnyu-i ashi.

Iba Hospital tasen atema nüngshilong azüngba sentong nung, Health Minister-i nūburtem dang Covid-19 vaccine agitsü aser coronavirus tashidak prokba azioktetsüsa kümdanga alitsü atema ayongzük. Iba hospital nung nüngdakba ajak peridakja maparen yakta tenzüktetsü atema, mozüki nung mapa inyaktsü pur atema post akadoktsü aser iba dak sendakba tanga maparen den DPR yakta tembanga inyakadoktsü asoshi pai H&FW ketdangsürtem ajungshia liasü.

Taoba küm Nagaland State nunga nūburtem coronavirus wara agi timtemba mapang, district hospital balala rongnung CHC jenjang den maparen takok ngua inyakba district hospital ka ama achaayangtetba aser iba wara anema bendanga

agütsür noktakba atema, Pangnyu-i District Task Force, Frontline Workers, Sorkar Ketdangsürtem, lokti nung balala, PBCA aser Arogo dang pelaba metetdaksü.

DC, Longleng, M. Shayung Phom-i, Longleng District atema Covid-19 wara ya temoatsü ka ama liasü, kechiyong iba mapang Hospital jenjang ajungkettsü asoshi lenmang aisü nungi meimlaba terenlok maparen balala ajangzüktetogo, ta tuteta jembi.

Iba virus anema raratsü asoshi health care facility tem kanga dang tongtibang ta ajiteta, lenmang balala nungi teyari ngua Covid Hospital aser District Hospital anaprongla nung aliba osettem ajanga maparen süsümedema takok ngua bener aoba indang Shayung-i metetdaksü.

Director, Health, H&FW Dr. Neikhrilie Khimiao-i, nūbur teyari medeni Department kija agi dangbo iba Hospital maparen takok ngua bener motettsü asünung, iba Hospital jenjang tajungbai ajungkettsü asoshi nūbur ajak longjemmer inyaktsü asoshi pai ayongzük.

Iba project (Longleng District Hospital) dak sendakba nung Er. Moanaro, Executive Engineer, Medical Engineering Division, Kohima-i, iba mozüki ya yipden 50 aliba Hospital ka alitsü, koba sen cr. 12 indoktsü asadangteter, ta osang agütsü.

Lai ashiba agi, DPR maparen teinyakdak lir aser iba maparen yakta tembangtsü, ajisüaka iba kisü jensü maparen takaratiba nung tembangtsü atema ali kimung maparen tarensen agi inyaktsü.

Kasa sentong nung President PPC, President Phomla Hoichem, President Longleng Town ward aser Chairman Orangkong Village nungeri jembiogo. Medical Superintendent, DHL Dr. Lhouvizotuo Belho-i telok pelaa agizük. Iba sentong nung Dr. Ademla Tinu, SMO, DHL menden liasü aser Dr. Obangjungla, CMO, Longleng-i tepela anküp o jembi.

Maneni, Yachem PHC nungi Community Health Centre agi melenba tesem ka Medical Minister-isa lapoktsü. Yachem nung CMO Longleng-i telok pela agizük aser Dr. Obangjungla-i 'Health Status' tongmelang agi rasa ashi. Iba sülen, EAC Yachem, Pichano Kikon; Director, Health, H&FW Dr. Neikhrilie Khimiao; Head Barrick Yaongyimchen. Longkang; Chairman Alayung Village, Manshei; Chairman Sanglu Village, Mokba; 2nd Barrick Yachem Longnyu aser President PPC, Shami Angh nungeri o jembi. Iba sentong nung MO Yachem, Dr. James menden liasü, ta kasa sangdong ajanga metetdaksü.

SÜR KÜM ANA AJUNGER



Lt. S.I. Tangit Imsong (Yaongyimsen)

Temeim Oba,

Aonung pungmang ka ama nü aküm onok dak nungi pilar küm ana tanü abensar. Nü temeim aküm kübok nü shisatsü aser sempet tajung agi nai onok timtem lendong ajak nungi kümzüka anitetba onok mulungjang nung teti lir aser taküm tepiyong alitsü.

Tanü na iba lima nung meliaka, onoki nü mapa tajung kodanga mamateter. Tanü anogo ya ajaki anir onok ajaki nüktzü neta na bilemteter.

~ Temeim Kinungtsü, Jala, Jabaso aser Kinungertem.

SÜR KÜM KA AJUNGER

Tasüba küm: 11/03/2020

Temeim Oba,

Na onok den mali küm ka junga arudang onok mulungjang nung teti alir aser nü mapa tajungtem bilemtetdang onok mulung ajungmesor. Tanü na iba lima nung meliaka ojalai anir onok ajaki na bilemteter.



Temeim kinungtsü, jala, jabsotem, semchirtem

GOVERNMENT OF NAGALAND DIRECTORATE OF HEALTH & FAMILY WELFARE NAGALAND: KOHIMA

No. DHFW-5/23/TRG-NSG/2017/2108

Dated, Kohima the 11 th March, 2021.

NOTIFICATION

In Pursuance of this Directorate Advertisement No. DHFW-5/23/TRG-NSG/2017/8530-35/Dated, Kohima the 29th September 2020, the list of Selected Candidates (Merit wise) for undergoing GNM & FHW training for the Academic session 2020-2021 can be downloaded from the Department's Website www.nagahealth.nagaland.gov.in and DHFW Office Notice Board.

SD/- DR. KEVICHUSA MEDIKHURU

Principal Director
Directorate of Health & Family Welfare
Nagaland Kohima

Issued by DIPR

Indigenous Art Formation Workshop tenzükogo



Dimapur, Metsüremi/March 11 (TYO): Indigenous Art Formation Workshop lapokba sentong March 11 nü Langpangkong GB's Community Hall Changtongya Town nung agiogo. Iba sentong ya anogo ana agitsü.

Iba sentong ya Youth Moulding Center Changtongya

Town-i achaaynga agidar. Tanü sentong, Markala lenisüba nung agi aser Asso Pastor CTBA Rev. T. Aliba Imchen-i lokti pelaa agizükba o jembi liasü. O jembi mapang pai iba workshop ayongzüka agiba nükjidong lemsatet aser sentong nung shilem agirtem dang iba

maongka takok tashi agitsü ajungshia liasü. Maneni Asso Pastor Youth CTBA Imyapangba-i sentong nung Tsüngrem temoatsü jazüka sarasadem. Workshop nung shisalen agütsürji Youth Moulding Center Changtongya Town, Counselor Imotemjen Ozukum liasü.

"Keep Our City Clean" puri nūbudok mapa ayongzük



Kohima, Metsüremi/March 11, 2021 (TYO): Brehostibarnü (11.03.2021)

"Keep Our City Clean" team den Entrepreneurs Development Agency (EDA) longjemmer merükmejuba (cleanliness drive) sentong ka ayonga agiogo.

Iba nūbudok mapa ya Razhu

Point nungi tenzüka KFC outlet area, Keziekie tashi inyaka liasü.

"Keep Our City Clean" team nungi Khriehuzo Lohe-i, taruba nūbudok mapa ya Honibar (March 13, 2021) anepdang 7:00 ako nungi tenzüka D'Block area, Kohima nung inyaktsü, ta metetdaksüogo.

Champions League: Liverpool quarter final-i iogo

Budapest, Metsüremi/ March 11, 2021 (Agencies): Bodhbarnü, Champions League asaya nung Liverpool-i 2-0 agi RB Leipzig koka quarter-final tongtetogo.

Jurgen Klopp'er teloki mezüing leg asaya yimya kasa amshia shilem agia liasü, kong parnok Premier League tebilemtsü pungbadaktsütsü asoshi tanabuba half nung Mohamed Salah aser Sadio Mane nati goal ka ka idakja Liverpool-i 4-0 aggregate nung Leipzig tsükdaktsü.

Anfield nung trokben tashi atonga tamakok ngua aser tan Premier League table nung jenjang 8buba tashi tesüleni aluba sülen, Klopp'er telok Champions League quarter tongteta anisüngzük tulu nguogo. Coronavirus wara tenokdangba ajanga Champions League leg tanabuba ya Hungary yimtiba nung asayar.

"Tanü parnoki bilemba ama tongteta asayaogo. Premier League nung atalokba tem amadoker iba League nung junga merangdangtsü temulungtetba nung asaya. Taonung, asayartemi (Liverpool) aginüba ama pelashishia asayaogo, koba team atema mera tongtibang lir," ta Klopp-i ashi.

"Iba takok ya onok atema kanga dang tuluka lir. Premier League asaya kar nung onok kanga mejungi tamakok nguogo. Tang team pur jenjang kanga ajungbo masü, saka Champions League nung maneni toktepa asayatsü terenemba lir," ta Salah-i ashi.

"Tan Premier League kanga timtema asayaogo aser ajaki ngur alitsü. Taoba küm iba League nung onok temaba jenjang tongteta takok ngua asaya aruogo. Taküm onok rongnung asayar kar yiruba ajanga asaya kar nung bilemba ama masayateti tamakok angu. Onoki item tamakok ji asaya tanga nung küpdangtsü meranger, saka aji kanga dang tasak," ta Salah-i shisem.

Iba asaya tenzükli nungi Liverpool-i Leipzig pur amokbanga asaya, saka mezüing half tashi parnoki goal idaktsütsü maongka tajung ishika magitet.

"Mezüing half tsüingda onoki goal idaktsütsü maongka tulu angu aser item nungi goal ka danga meinoktsütet, koba 2021 küm onoki iba ama tia ajangshia arudar," ta Klopp-i ashi.

Tanabuba half nungang Salah aser Mane nati aibelen mesüi goal idaktsütsü maongka agitet, kong minute 79buba nung Salah-i mezüing goal inoktsü aser minute pezü sülen Divock Origi ajanga metsüba cross ball ka Mane-i agizüka telok atema goal tanabuba idaktsü.

"Leipzig puri junga asayaogo, kechiyong parnoki toktepa asayaba ajanga defence tsütsü onok tali kümdangshia asayatsüsa aküm. Parnok (Leipzig) ya tashitait team ka lir," ta Klopp-i ashi.

Kasa Champions League asaya tanga ka nung Argentina striker Lionel Messi-i penalty ka metsüpetba ajanga Paris Saint-Germain aser LaLiga nung team tajung Barcelona na

tsüingda goal 1-1 draw nung tembanga France indang club Paris Saint Germain-i 5-2 aggregate nung koker sülen quarter-final-i iogo.

Parc des Princes nung iba tenzüker PSG atema France striker Kylian Mbappe-i penalty ka metsütsü maongka ngua minute 30 nung mezüing goal idaktsü. Ajisüaka, tatsüka dang lir Barcelona-ia telangzüba agüja minute 37buba nung Messi-i goal ka idakja telok ana tsüingda goal kasa shi aküm.

Goal ana dak alaka tanabuba half nung team kati danga goal talila meinoktsütet.

Arishi küm 22 aser anogo 80 tain Mbappe-i iba League nung goal 25 idaktsür alitsü, koba Champions League putiotsü nung iba alizüing tongteter asayar rongnung pa tanubosang kümogo. Iba den külemi, Mbappe-i Messi (Messi arishi küm 22 ser anogo 286 tain alidang) record ajatetogo.

Mongolbarnü League asaya tanga ka nung Juventus pur tsüker sülen, tang Barcelona team iba asayamung nungi tsüker alitsü. 2007 küm nungi Barcelona team Champions League quarter final tongteta shilem agia arur sülen parnoki tan League quarter metongtetba ya mezüing alitsü.

Tan season last eight nung Messi süshia mesüra Cristiano Ronaldo nati shilem agiba mangutsü. 2005 küm nungi Champions League quarter final asaya nung tenati shilem agia arur sülen taküm quarter nung tena madenba ya mezüing alitsü.

Latham lenisüba kübok New Zealand asayatsü

Wellington, Metsüremi/ March 11, 2021 (Agencies): Bangladesh den aruya aliba one-day international series atema New Zealand skipper Kane Williamson melen wicketkeeper-batsman Tom Latham-i anir team-i shilem agitsü, ta Brehostibarnü New Zealand Cricket sangdong ka ajanga metetdaksü.

Latham-i aniba squad nung asayar tasen asem Devon Conway, Will Young aser Daryl Mitchell nungeri iba ODI series nung mezüing asayatsü terenemba lir. March 20, 2021 nü Dunedin nung team ana tsüingda ODI asaya asem series tenzüksü.

Deobarnü, Twenty20 series nung Black Caps-i 3-2 agi Australia akokba sülen, Williamson abilen tekatsü yirur aliba ajanga pa aruya aliba ODI series nungi agienadok.

"Kane ama takoktet asayar ka medeni series asayatsü ya tezüdangtsüka lir, saka pa melen tetemjen asayar ka ama Tom nguogo aser pai New Zealand team anir iba series nung asayatsü yongyadar," ta

sangdong ka ajanga selector Gavin Larsen-i metetdaksü.

Fast bowler Lockie Ferguson-a terberem yirur aliba nungi ano junga taneptsü mengui lir asünung, pa maneni temang anepalua mungdar aser all-rounder Colin de Grandhomme achiji temopo teloktep surgery agitsü aliba ajanga iba series nung pa-a masayatsü. 2020-21 season tenzüker Colin iba timtem agi kangshia arudar.

New Zealand coach Gary Stead-i ashiba agi, iba ODI nung De Grandhomme timtem ajanga masayatetsü ta osang angazüka mepelar, saka England Test tour nung pai tanaben cricket nung shilem agitettsü teimla lir.

New Zealand team pur ano Tests ana asayatsü terenemba lir. Mezüing Test ji England den alitsü aser June 18 nungi 22, 2021 tashi Southampton nung India team den World Test Championship final asayatsü.

"De Grandhomme surgery agiba sülen, tanaben squad den külemi asayatsü teimla lir," ta Stead-i ashi.

Iba ODI series nung De Grandhomme melena, züingsem 13 squad nung Mitchell asayatsü. Bangladesh ODI series atema pa den külemi James Neesham aser Mitchell Santner naprongla anisemogo.

Alima ajunga asüingba COVID-19 tenokdangba ajanga, March 13, 2020 Sydney nung Australia-i parnok tsükdaktsüba sülen, aruya aliba series ya New Zealand indang mezüing one-day international asaya alitsü.

Dunedin nung iba series tenzüka asayaba mapang, Latham-i 100buba ODI asayatsü terenemba lir. Kasa mapang pa den Canterbury nung külemi asayar Henry Nicholls-a pa indang 50buba ODI asayatsü.

Iba ODI series atema New Zealand squad rongnung asayartem ji - Trent Boult, Devon Conway, Martin Guptill, Matt Henry, Kyle Jamieson, Tom Latham (capt), Daryl Mitchell, Jimmy Neesham, Henry Nicholls, Mitchell Santner, Tim Southee, Ross Taylor aser Will Young nunger alitsü.

2nd MOKOKCHUNG TOWN INTER-WARD FOOTBALL TOURNAMENT OSANG

March 11 result:

Arkong Ward (1) - (0) Dilong Ward
Salangtem Ward (0) - (3) Mongsenbai Ward
Tongdentsuyong Ward (5) - (0) Kumlong Ward
Sungkomen Ward (0) - (2) Yimyu Ward

March 12 match yamai asayatsü:

1st Match: Artang Vs Aongza @ 11:00 AM
2nd Match: Majakong Vs Sangtemla @ 12:00 PM
3rd Match: Alempang Vs Penli @ 2:00 PM
4th Match: Marepkong Vs Lijaba Lijen @ 3:30 PM

Elite Badminton Club-i badminton asayamung ayongtsü

Dimapur, Metsüremi/March 11, 2021 (TYO): Vidhya Bhawan Higher Secondary School, Kuda, C- Khel, Lane-17, Dimapur nung March 19 aser 20, 2021 nü "Older, Faster, Fitter" omen nung ajemdaker Elite Badminton Club, Dimapur-i All Nagaland Veteran (Tebur) Badminton Tournament 2021 ayongtsü terenemba lir.

Iba asayamung nung shilem agitsü atema telemsatem:
1) 75 +(Minimum of 35 years)
2) 85 +(Minimum of 40 years)

3) 95 +(Minimum of 45 years)
4) 105 +(Minimum of 47 years)
Maneni, telemsa (category) ajak nung takok angur aser runners-up nem senpet sen 20000/- aser sen 15000/- agütsütsü.

Entry atema March 16, 2021 nü tashi lapoktsür. Anüingji tejangrar temi item Contact.no 7005620960/7005632870 / 8794927966 nung tongteprateptsü akok, ta Elite Badminton Club, Dimapur ajanga metetdaksü.

Anthibung Town nung Referee Clinic tenzükogo

Peren, Metsüremi/March 11, 2021 (TYO): Dept. of Youth Resources & Sports, GoN aser Referee Association, Nagaland den Recreation Club Ahthibung (RCA) longjemer Bodhbarnü, Ahthibung Town Public Ground nung Referee Clinic sentong tenzüksüogo.

Iba sentong nung G. Kamei, General Secy. DDFRA, Avar Danla, State Referee aser Vihokhe Assumi, State Referee nunger shisalen sayur ama alitsü. Anthibung Sub-Division nung iba amala sentong ya mezüing alitsü, kong anogo

asem tashi ayonga agitsü aliba Clinic sentong atema lanur 22 agi tenüing agütsüogo.

Town Hall, Ahthibung nung Referee Clinic lapokba sentong tatsüka ayonga agi aser Vice Chairman RCA, Henpu Singson menden liasü. RCA Chairman, Tonga Hangsing-i iba sentong indang nükjidong metetdaksü. Secy. RCA, Chungminthang Singson-i training agitsüpur tem dang Referee Clinic dak sendakba tongmelang agi rasa ashi, ta sangdong ka ajanga metetdaksü.

Kohima District Level Sobaliba asaya tokteptsü

Kohima, Metsüremi/March 11, 2021 (TYO): IG Stadium, Kohima nung March 27, 2021 - Honibarnü Kohima District Level Indigenous Games tetoktepba ayonga asayatsü, ta sangdong ka ajanga metetdaksü.

District Sports Officer, Kohima, Dziesebeinu Vizo-i, iba tetoktepba ya asaya balala talisa tetsür aser tebur atema arr-atsütepba (team shia nungi nisung 8), stilt bamboo race (tebur), greased bamboo pole climbing (tebur) aser cock fight (tebur) asayatsü terenemba lir, ta ashi.

Arr-atsütepba nung 1st, 2nd aser 3rd jenjang nung takok angurtem atema senpet sen 10,000/-, sen. 7,000/- aser sen.

5,000/- den kulikaket agütsütsü renema lir. Kasa mapang, stilt bamboo race, greased bamboo pole climbing aser cock fight atema 1st, 2nd aser 3rd nung takok angurtem nem senpet sen 3,000/-, sen. 2,000 /- aser sen 1,000/- agütsütsü. Iba den bendenloksema, item asaya nungi takok angurtem Kohima district tenüing nungi aruya aliba State Level Indigenous Games Competition nung shilem agitsü maongka angutsü. State Level tetoktepba ya April 8 aser 9, 2021 nü I.G Stadium, Kohima nung asayatsü.

Tejangrartemi, March 25, 2021 matongdang contact no. 70856527217 aser 8794538800 nung tongteprateptsü akok, ta kasa sangdong nung shia lir.

BILEMDANGANG

"Tilaka meteta yur ajak apijema metet ama mebilemtsüla."